

KOROSAI

Poru Gigirum Meuma Korosai Igiyawa Munan Tenewa

1 ¹Poru me Iesu Keriso apasoro meuma God anoiviwa gumbe, sira Timoti me nu gwanunwa,
²nu ye iyayapan iyakaisi sira tatungwanun anotumat oraiwa igiyawa mu Korosai apa wakeyawa gumbo yenan teete.
Mamunwa God gumbe God ano oraiwa ge yum ye guniyap wakeigimpe.

Gaun Ge Nun

³Nu yenan evedni nun vete, God me Ayapan numa Iesu Keriso Mamawa gumbe gaun vete. ⁴Kuiyawa nu anotu anotumat yeuma Keriso Iesu gumbe, sira baigan yeuma me iyayapan iyakaisi undag gumbo auene. ⁵^bYe mame enewa me owanowan me kwimin dana yenan teg wakeiviwa apa, uwane. Ye gae oraiwa gae natawa danave owanowan mame oya wait anoyana. ⁶Ye God ano oraiwa anoyana, sira natawa di yang anoyana kumiwa apa onne gare, ye yapeyap gae oraiwa me wateteyamivi sira natawa inivi. Me mina, gae oraiwa mame tatevit wateteyamivi at undag piyu mame danave, sira natawa inivi. ⁷Epapiras me ne baigan neuma da sira nau neuma desiroma aiviwa da, me gumbe meib ye anog yang anoyana. Me nunanwa oya Keriso gumbe anotumat ag nau meuma aivinewa da. ⁸Me baigan yeuma me Guwawa Iyakaisiyapama yennewa oya nu didnunne anotu.

⁹^dNu me anotu, meoya me kumiwa apa onne gare, nu evedni yenan nun vete. Ne imunap guwawa anoanowawa ge guwawa yang anotanwa gumbe, anoano natawa me God ano meumawa oya me guniyap noidauwape. ¹⁰Sira

^a 1:3-4 Epe 1:15-16 ^b 1:5-6 Epe 1:13; 1Pi 1:4 ^c 1:7-8 1Ko 4:12; Prm 23

^d 1:9 Epe 1:16-17

nu imunup ye Ayapan amave aisenewa me dividivi undag gumbe God degadega ape, ye dividivi oraiwa enewa undag gumbe natawa inampe, sira God gumbe anoano meuma obiren egave ye auya. ¹¹eSira nu imunup God eyawa yusipama gumbe yusiwa kokavit yempe, sira yaimoyai wakeigimiya imidanewa oraiwa gumbe wakeigimiya. ¹²fNu imunup Mamunwa God gaun waniya. Me ane nu kwan me eyawa danave wakenewa autanwa igiyawa atu. God kwan mame tamibarip ane iyayapan iyakaisi oya. ¹³gGod nu tam nunne sisip yusiwa gumbe, sira nu tam tenunne Usiwa yusiwa ankwatave. ¹⁴hNu Usiwa danave wakeete. Me garawa baraug nu sira gwiruwad nunne, kukaeba numawa anog yankwene.

Keriso Gumbe Ano Kokavitwa

¹⁵iMe God me guwavewa irawa, sira me ud namui ren yainewa, dividivi undag ivi wadne. ¹⁶Kuiyawa dividivi undag me Usiwa gumbe wadne. Kwimin danavewa ge piyu egavewa, yavetewa ge den yavetewa, kin seyaeba, yusiwa kokavitwa, amarananwa sira ano yusiwa, mame undag me gumbe wadne. Usiwa me dividivi undag wadne, sira menan oya wadne. ¹⁷jUsiwa namui ren wakene, ivi dividivi undag wakeya. Dividivi undag Usiwa gumbe oma ane wakeeme. ¹⁸kSira siosi me Usiwa kwapiwa, Usiwa me siosi kuiyawa. Usiwa me namui renwa, me namui ren yainewa boriruwawaya gumbo. Mame mina, dividivi undag gumbo me namui ren ane. ¹⁹lKuiyawa God me ano meuma gumbe ane God imidanawa noidauwanewa dividivi undag Usiwa danave wakepe, ²⁰mGod me yoma korosi diyawa gumbe yum baraune. Me Usiwa gumbe dividivi undag gumbo baigan toborane. Me dividivi undag piyuwauwa ge kwiminauwa gumbo Usiwa gumbe baigan toborane.

²¹nYe namu God gaibu onan, sira anoano yeuma gumbe ye God anaviyawa, sira anoano kukaeba ene. ²²oMegara gare mame Usiwa kwapiwa meuma ge bo meuma gumbe God ye guniyap baigan toborane. Natawa me ye iyakaisiyapama, kukaeba da onan, pui den yuyempewa igiyawa atanwa oya, sira aivine ye God namive yoitanwa oya. ²³Megara ye nium apa yaimoyai yokeya, sira ye gae oraiwa owanowan me wait anoyanawa gumbe den kweg aisiya. Ye anotumat apa di wakeya. Opata gae oraiwa mame iyayapan undag me God kwimin ankwatave wadnewa gumbo wag wateteyameme. Ne Poru me nauwawa eni abnawa ana.

Poru Nau Meuma Siosi Oya

²⁴Divi yenan edawai aunawa oya gare ne degadega eni.

^e 1:11 Epe 1:19; 3:16 ^f 1:12 Epe 1:11,18 ^g 1:13 Ruk 22:53; Epe 2:2 ^h 1:14 Epe 1:7
ⁱ 1:15 Jon 1:18; 2Ko 4:4 ^j 1:17 Jon 1:1; 8:58 ^k 1:18 Apa 26:23; Epe 1:22-23; Rev 1:5
^l 1:19 1Ko 2:9 ^m 1:20 Epe 1:10 ⁿ 1:21 Rom 5:10; Epe 2:12 ^o 1:22 Rom 5:10; Epe 5:27

Keriso kwapiwa oya ne anoeniwa, Keriso edawai me oma den anewa oya ne kwapunwa gumbe matai noidauwape. Keriso kwapiwa me siosi. ²⁵^pNe nau me God yenan oya nednewa auna. Nau me gumbe, ne siosi oya nau eni abnawa ana. Natawa me God gaiyawa undag wateteyamtan oya. ²⁶^qAnoano guwavewa mame me guwawe wakene jobu watavit ampa di onne, megara iyayapan iyakaisiyapama gumbo God me taibe toyau munne. ²⁷God imive iyayapan iyakaisiyapama mu yaug anope anoano guwavewa me taibe anewa me Ju onan igiyawa yapowo eyawa gumbo noidauwane. Anoano guwavewa taibe anewa me Keriso me guniyap wakenewa. Keriso me eyawa owanowan meuma.

²⁸Nu Keriso mame wag wateteyamete. Nu anoano numa undag gumbe iyayapan gwangwan wag dirumete, sira toyau munete. Natawa me nu ata iyayapan undag yaig yoipe Keriso gumbe oraiminavit ag wakepe. ²⁹^rMame oya Keriso yusiwa me daneyap nau aiviwa gumbe, ne mina gaibu nau eni sira nau yusipamit eni.

2 ¹Ne imunap ye undag yaug anoya, ye ge Raodisia igiyawa, iyayapan ne ginanwa den yaunegiyawa oya, ne anintom mina yenanwa ibnawa aueni. ²Ne imunap, mu yutuwa mumpe, baigan gumbe tobot ape, sira mu yaug anotanwa yusipamit waribiyape. Sira ne imunap mu Keriso me God guwabewa taibe anewa yaug anope. ³^sKeriso mame danave tawara oraivitwa me anoanowawa ge yaug anotanwa undag guwawe wakeya. ⁴Ne mame veni, kuiyawa ne imunap bira da den ye namuyoiyoi aiyempe ano uga gaiyawa me taibewa yautanwa oraiminawa gumbe. ⁵^tNe kwapunwa gumbe ye guniyap ube, megara guwawa gumbe ne ye guniyap. Ne ye wakewake yeuma oraiminawa sira ye anotumat yusipamit yeuma Keriso gumbe yauna, meoya ne degadega eni.

Inaiinai Oraiwa Iesu Gumbe

⁶Mame mina, Keriso Iesu Ayapan ye auyana, meoya me gumbe aisigimiya. ⁷Keriso gumbe taiwa yeumawa aikpe, meve me egave inaiinai yeuma sig dorigimiya, sira anotumat yeuma gumbe yusipamit aigimiya toyau yennewa gumbe. Sira guniyap gaun yeuma kokavit noidauwape me gumbe.

⁸Iyayapan da ano mumawa me natawa gaibu onan, sira ugaugaeba, meoya ye yaukape, ye den amowo aisiya. Gae me minawa me iyayapan anoanowawa, piyu mame yusiwa kukaeba apa uwanewa, me Keriso gumbe onan.

⁹^uKuiyawa Keriso danave God inaiinaiba undag apan kwapive wakeivi. ¹⁰^vKeriso gumbe inaiinai undag ye guniyap noidauwane. Yusiwa

^p 1:25 Epe 3:2,7-8 ^q 1:26 Rom 16:25-26; Epe 3:5,9 ^r 1:29 Epe 3:7,20; Pir 4:13

^s 2:3 1Ko 1:24,30 ^t 2:4 Rom 16:18 ^u 2:5 1Ko 5:3 ^v 2:7 Epe 3:17 ^w 2:9 Jon 1:14,16

^x 2:10 Epe 1:21-22

undag ge ano yusiwa undag me Keriso ankwatave. ¹¹YKeriso gumbe ye kwapituitui ayana. Iyayapan nanuwo gumbe onan. Keriso kwapituitui meuma gumbe, Keriso me ye anoano kukaeba yeuma me atan aune. ¹²ZBabataito gumbe ye Keriso gaibu sig umiya. God Keriso bo gumbe sira inaigisiana. Ye God yusiwa meuma gumbe anotumat ayana. Anotumat yeumawa gumbe, ye sira inaigisiana.

¹³AYe kukaeba yeumawa ge kwapiwa kwapituituiyawa onanwa gumbe boriruwayana. Megara God ane ye Keriso gaibu sira inaigisiana. God me kukaeba numa undag anog yankwene. ¹⁴BGunup gigitum me garawa wantanwa oya tenewa wakene. Gigitum me anavi ag nunne, sira me did nunne. Megara God gigitum me nunanwa oya wakukam yankwene. Sira korosi egave tone. ¹⁵God me amaratanwa ge yusipamitwa wakukam yankwene, taibe toewan munne, sira gog toeme mu egowo dumbai dambai emeg amome.

¹⁶CMeoya nakwai ge yoi oya, go buyunai ge dud mataiwa ge Sabat Kumiwa oya, bira da ye den diruipe. ¹⁷DDividivi mame me dividivi matai oniviwa gugupawa, dividivi natawa me Keriso. ¹⁸Iyayapan mu mumbovit noga monamon gumbe yusipamit mokona eme, sira aneya waiya waiya emewa wakeya. Den kwema ugai yem garawa yeuma aupe. Mu irakoniwa uyavi minawa yaveg mu imuwo degadega eme. Kwapuwa anoano muma gumbe nata onanwa gumbe mumbovit waieme. ¹⁹E Mu kuiyawa gumbe den yunasiya. Kuiyawa mame, koniwa ge yaoba gumbe ui kwapiwa undag amatawa aivi, yumnadne, sira God ane ui kwapiwa undag yaivine.

²⁰⁻²¹FYe Keriso gaibu boriruwayana, sira piyu mame toewanewaneba amatonewa yankwemiyana ipewa, ye piyu anoano meuma gumbe vineme mina, aninin ye toewanewan kukaeba gumbe ande tuene? “Den auya, den naya, den yumiya,” dividivi mame me natawa onan. ²²GDividivi mame undag me aigimpewa kukaig onanape. Me iyayapan gwangwan ge toyau toyau muma gumbe wakeya. ²³Dividivi mame me mu anoano muma toewan muneme. Iyayapan nonomagowa gumbe God waiya waiya emewa gumbe, mokona gumbe, kwapuwa topaiemewa gumbe me yavetewa oraimina. Megara kwapiwa anoanowawa kukaeba gumbe mame yusiwa onan.

Inaiinai Iyakaisi Gwangwaneba

3 ¹HMeoya ye Keriso gaibu sira inaigisianawa me natawa ipewa, ye dividivi painauwa autan anoigimiya. Me apa God naniyutanwa apa Keriso wakene. ²IYe piyu mame egave wakeyawa oya den anoya, dividivi

^y 2:11 Rom 2:29 ^z 2:12 Rom 6:4 ^a 2:13 Epe 2:1,4-5 ^b 2:14 Epe 2:14-16; 1Pi 2:24

^c 2:16 Rom 14:1-13 ^d 2:17 Ibr 8:5 ^e 2:19 Epe 2:21; 4:16 ^f 2:20-21 Gar 4:3,9; 1Ti 4:3

^g 2:22 Mat 15:9 ^h 3:1 Mak 12:36; 16:19; Epe 1:20 ⁱ 3:2 Mat 6:33

painau wakeyawa oya anoya. ³Kuiyawa ye wait boriruguayana, sira ye inainai yeuma me guwawe wakene Keriso gaibu God danave. ⁴Keriso me nu inainai numawa uwapewa, me kumive ye gaibu Keriso gaibu uwaya eyawa gumbe.

⁵^jMeoya dividivi piyu mame inainai gampenwa meuma toen guriya. Uinantaraki, miyot, ano kukaeba vesin ge apan yapowo, ano kukaeba nuniatatu, dividivi mame toen guriya. Mame me god ugaugaeba waiya atanwa. ⁶Mame gumbe God danapiriwa aikpe. ⁷Ye gaibu watavit dividivi mame danave wakeyana. Me kumive meis aisiyana. ⁸^kMegara ye gaibu gare mame di mame undag epa aoreya: danapiri, diguragut, ano kukaeba, gae kukaeba sira ubmam gaiyawa, me noiwa gumbe uwapewa. ⁹^lGara ugaya den aya. Ye wait apan namuwa aropiyana dividivi ayanawa gaibu, ¹⁰^msira apan mataiwa eniyana. Apan mataiwa me Apan asime wadnunnewa irawa yauyawa danave sira tobiyag mataiven aigimpe, sira natawa anoanowawa aupe. ¹¹ⁿMe apa, Griisu igiyawa ge Ju igiyawa mu ubeube onan, kwapituitui igiyawa ge kwapituitui onan igiyawa mu ubeube onan, anoano oraiwa onan igiyawa ge Sukute igiyawa mu ubeube onan, ankwatave nau eme igiyawa ge ui onan igiyawa mu ubeube onan. Keriso me undag, sira undag danave wakene.

¹²^oYe God watgomiya yenne igiyawa, sira iyakaisi ge God nonemagave igiyawa. Meoya ye kokavit ano muntanwa, baigan, mokona, nonewa memeyu, sira di iyai wakeiviwa, dividivi mame eniya. ¹³^pGaragara iyaigit wakeya. Garadi enewa, garagara anog yankweya. Ayapan yenan anog yankwene, meoya ye gaibu anog yankweya. ¹⁴^qSira undag mame egavewa, baigan eniya. Baigan me berip oraiminavitwa mame undag tutan oya.

¹⁵^rKeriso yumiwa me nonemagewa amaraigimpe. Meib atan oya, God yenan auwane, sira ye kwapuiwa desirom ane. Sira ye gaun igiyawa aya. ¹⁶^sKeriso gaiyawa mauraeba kweya daneyap wakeigimpe, sira gara toewan aigimiya, sira garawano aigimiya anoano yeuma undag gumbe, sira God gumbe gaunipam bererin toigimiya Sam ge bererin ge guwawa bererinawa gumbo. ¹⁷^tYe gae gumbe go atanwa gumbe dividivi aninin ayawa, ye me di aya Ayapan Iesu iviwa gumbe, sira Ayapan gumbe Mamunwa God gumbe gaun waya.

Gwe Aninin Amat Oraivit Atanwa

¹⁸^uBivituiwa, ye Ayapan gumbe wakeeme igiyawa, meoya yaimoyai memetuiwa nouwa auya.

^j 3:5-6 Rom 6:6,11; Epe 4:19; 5:3-6 ^k 3:8 Epe 4:25-29; 5:4 ^l 3:9 Epe 4:22,25
^m 3:10 Epe 4:24 ⁿ 3:11 Gar 3:28 ^o 3:12 1Pi 2:9 ^p 3:13 Epe 4:2,32 ^q 3:14 Rom 13:8-10
^r 3:15 1Ko 12:27; Epe 4:4; Pir 4:7 ^s 3:16 Epe 5:19 ^t 3:17 1Ko 10:31; Epe 5:20
^u 3:18 Epe 5:22

¹⁹Memetuiwa, bivituiwa gumbo baigan aya, sira inaiinai kukaeba mu gumbo den aya.

²⁰Ud, inemameaiwa nouwa auya dividivi undag gumbe. Me gumbe Ayapan degadega aigimpe.

²¹Ye Mamawawiwa, usitainewa den aya danopiriwape. Yutuwa kudnausiren den ape oya.

²²Ankwatave nau eme igiyawa, dividivi undag gumbo, koukawa yeuma piyuwau wakeyawa nouwa auya. Yangewavit den nau aya, sira iyayapan mukut oya anog den nau aya. Ayapan oya a ag ebnotu aya, sira nonemagewa oraimina gumbe koukawa yeuma nouwa auya. ²³Ye dividivi ayawa, nonemageyap undag aya iyayapan gumbo onan megara Ayapan gumbe. ²⁴Ye yang anoyana, garawa Ayapan gumbe, kwan God yenan amaraiwiwa matai auya. Ye Ayapan Keriso nauwawa ene. ²⁵Ebu desiroma, ano kukaeba eme igiyawa mu matai garawa muma mumbovit kukaeba muma oya aupe. God anoano meumawa da desirom gumbe onan. Me undag.

4 ¹Koukawa, ye yang anoene Kokawa yeuma kwimin danave wakene. Meoya ye ankwatave nau eme igiyawa oraiminawa ge oma oma gumbe amat muniya.

Toyau Toyau Egavewa

²Yangewa mereruwape sira gaun waigimiya, meis di nun waigimiya. ³Ye nunan gaibu garawapa nun waya, oma ane gae meuma oya God ankwin watappe, sira nu oma ane Keriso guwavewa taibe anewa dirumigimta. Mame oya ne murap gumbe tunegiya. ⁴Sira nun waigimiya, ne oma ane ebu meis waigimpna, ne guwavewa me taibe anewa mame taibe watna. ⁵Ye daieven igiyawa gumbo aya anoano oraiwa gumbe, sira kumive kumive iyaiyai aigimiya. ⁶Opata yeuma me evedni God ano oraiwa noidauwaigimpe sira siuran gumbe demtawa ape. Ye meis ayawa, ye oma ane yang anoya garawa iyayapan desirom desirom gumbo aninin waya.

Kaiwa Kaiwa Oieba

⁷Titikas me gwanenwa nonenmagawa, anotumat nauwawa abnawa sira Ayapan menan nau desiroma aivi abnawa. Ne wakewake neumawa undag me wag diruipe. ⁸Ne Titikas yenan barautna ompe. Kuyawa nu wakewake numa ye yang anoya, sira me gumbe ye yutuiwa auya. ⁹Me Onesimas gaibu yenan ompe. Me apan yeuma da, sira anotumat

^v 3:19 Epe 5:25 ^w 3:20 Epe 6:1 ^x 3:21 Epe 6:4 ^y 3:22 Epe 6:5-8 ^z 3:25 Rom 2:11

^a 4:1 Epe 6:9 ^b 4:2 Epe 6:18; Pir 4:6 ^c 4:3 Rom 15:30; Epe 6:19 ^d 4:5 Epe 5:15-16

^e 4:6 Epe 4:29; 1Pi 3:15 ^f 4:7 Epe 6:21 ^g 4:8 Epe 6:22 ^h 4:9 Prm 10-12

gwanenwa nonenmagawa. Apan duwam mame ye wakewake numa undag wag diruipe anoya.

¹⁰ⁱAristarukas me ne gaibu nog wakeetewa me gaun yenan waivi. Mak me Banabas iyai desiroma me gaibu gaun waivi.—Apan mame oya wanewa ye wait auyana. Me meib wane, me yenan ompewa baigan gumbe amaraya.—¹¹Iesu waya Jastas me gaibu yenan gaun waivi. Mu mukut kwapituitui igiyawa mu ne nau desiroma igiyawa God toimuwawa oya. Mu dananwa watmemeyameme igiyawa. ¹²^jEpapiras me apan yeuma da sira Keriso Iesu nauwawa abnawa me yenan baigan waivi. Me evedni nun yusipamit waivi. Me imive ye iyayapan oraiminavitwa ape sira ye God ano meuma undag anotumat ag iyaiyai tuiem yoiya. ¹³Ne guniyap taibe watna. Me yenanwa ge Raodisia igiyawa ge Ieraporis igiyawa oya me nau yusipamit aivi. ¹⁴Evunwa doketa Ruk, sira Demas mu yenan kaiwa kaiwa veme. ¹⁵Tatangwanen mu Raodisia apa wakeyawa, ge vesin Numpa, ge siosi me gweyave gumbo garawapa baigan waya.

¹⁶Namu gigirum mame ye guniyap basiyaya, ivi aya Raodisia igiyawa siosi mumawa apa mu basiyape. Ye gaibu gigirum me Raodisia apa ompewa basiyaya.

¹⁷^kSira Arukipas diya, “Ne imunap ge yaiyai yaukapa sira nau geuma me Ayapan gennewa a.”

¹⁸^lNe Poru ne naninap kaiwa kaiwa gigirumawa teeni. Anoya ne nog danave tunegiya. God ano oraiwa guniyap wakeigimpe.

ⁱ 4:10 Apa 12:12; 13:13; 15:37-39; 2Ti 4:11 ^j 4:12-14 1Ko 1:7; Prm 23-24 ^k 4:17 Prm 2
^l 4:18 1Ko 16:21